

INCIPIT EPISTOLA PRIMA SIXTI ROMANAE URBIS APOSTOLICI. DE- 30v
CRETA SIXTI.

Omnibus in deo patre et domino nostro Iesu Christo dilectis fratribus in caritate 1
domini nostri Iesu Christi Sixtus Romanae urbis archiepiscopus salutem.

5 Carissimi, fideliter agite in omnibus, ut fideles et non infideles inveniamini. 2
Nolite imitari malum, sed, quod bonum est, agite, quia, qui bene facit, ex deo est,
qui autem male, non ex deo, sed ex diabolo est.

Fidem enim rectam vos tenere oportet, ut dissentientes ab apostolica non sitis 3
doctrina. Unum enim verum deum patrem et filium a prophetis et apostolis osten-
10 dimus praedicatum, a quibus etiam spiritum sanctum credimus non esse discre-
tum Isaia propheta dicente: Ego sum deus et non alius praeter me. Et per meip-
sum iuro, quia exivit ex ore meo veritas, et sermo meus non avertitur, quia mihi
inclinabitur omne genu, et omnis lingua confitebitur per dominum dicens: Iustitia
et gloria ad eum veniet. Et ut in hoc testimonio patrem simul et filium fuisse co-
15 gnoscatis, Paulum apostolum audite dicentem: Ut in nomine Iesu, inquit, omne
genu flectatur caelestium, terrestrium et infernorum, et omnis lingua confiteatur,
quia dominus Iesus Christus in gloria est dei patris omnipotentis. Quod si secun-
dum aliquos filius minor est patre suo, ergo minorata est et gloria patris in filio.
Et ubi est, quod in Salomone scriptura loquitur dicens: Sicut etiam in conspectu
20 eorum, inquit, magnificatus es in nobis, ita in conspectu nostro magnificaberis in
illis, ut cognoscant te, sicut et nos cognovimus, quo non est deus praeter te, do-
mine? Diligenter attende et agnosce filium esse, qui magnificabitur in iudicio,
dum venerit vivos et mortuos iudicare. Item Isaias: Audite domus Iacob, et resi-
dui domus Israel, qui egredimini ex utero et erudimini a puero usque ad senectute-
25 tem. Ab initio ego sum et, quousque senescatis, ego sum. Ego vos feci et ego
sustineo, ego remittam, ego suscipiam, dicit dominus. Et iterum: Ego sum domi-
nus deus, praeter me non est alius deus annuntians novissima, priusquam fiant, et
statim consummata sunt. Item alibi: Ego sum deus, qui te creavi, qui te adiuvavi
et commovi dextera mea. Et unitatem patris et filii assignans loquitur dicens: Ego
30 testis vester, dicit dominus deus, et puer meus tu, quem ego elegi, ut sciatis et
credatis, quia ego sum et ante me non fuit alius deus et post me non erit. Unum
hi, qui non sane sapiunt, eligant e duobus: aut fateantur patrem et filium unum
deum, aut, si solum patrem deum esse contendunt, ergo illis dominus Iesus Chris-
tus deus filius non erit deus, quia scriptum est: Ante me non fuit alius deus et post
35 me non erit. Si secundum tales ita est, cur apostolus talia praedicat et eundem
filium deum super omnia benedictum insinuat? Quorum patres, inquit, ex quibus
Christus secundum carnem, qui est super omnia deus benedictus in saecula. Item
Isaias dicit: Dominus deus Israel, qui liberavit eum de Aegypto. Ego sum primus
et ego post haec et praeter me non est deus, sicut ego sum, qui stet et vocet et
40 praeparet mihi, ex quo hominem feci in saeculo. Item ibi: In te est deus et nescie-
bamus deus et non est alius deus praeter te. Tu enim es deus, et nesciebamus deus
Israel salvator. Unus deus, non sunt pater et filius, qui est hic deus, in quo es, 31r
dicitur deus pater, quem alium deum non esse propheta saepe numero protestatur?
Et Hieremias: Hic deus noster, ait, et non applicabitur alter ad eum, qui invenit
45 omnem viam scientiae et dedit eam Iacob puero suo et Israel dilecto suo. Post
haec in terris visus est et inter homines conversatus est. Et in Salomone habetur:
Miserere nobis, deus omnium, et ostende nobis lumen miserationis, et immitte

timorem tuum super gentes, quae non exquisierunt te, et cognoscant, quia non est alius deus nisi tu. Item ibi: Domine deus Israel, non est tibi similis in caelo sursum, neque in terra deorsum. Et in psalmo XVII: Quoniam quis deus praeter dominum aut quis deus praeter deum nostrum. Et in Geneseos: Et pluit dominus a domino ignem et sulphur super Sodomam et Gomurram et evertit civitates illas. Si solus pater deus est, quis pluit ignem et sulphur a domino supra praedictas civitates, ut eas everteret? Quaeso, responde. Et in Deuteronomio: Dominus solus deducebat eos et non fuit cum illis deus alienus. Et Paulus apostolus: Unus deus, qui iustificat circumcisionem ex fide et praeputium per fidem. Et ad Corinthios: Deus erat in Christo mundum reconcilians sibi. Et iterum: Non est deus nisi unus. Et ad Galathas: Mediator autem unius non est, deus autem unus est. Et unitatem patris et filii et spiritus sancti demonstrans Ephesiis scribens ita confirmat: Suffe-
rentes invicem in caritate, solliciti servare unitatem spiritus in vinculo pacis. Unum corpus et unus spiritus, sicut vocati estis in una spe vocationis vestrae, unus dominus, una fides, unum baptisma, unus deus. Si enim non sane sapientes unitatem fidei voluerint simplici corde recipere, hoc itaque testimonio in uno spiritu poterunt simul patris et filii unitatem condiscere. Patrem igitur, ut superius comprehensum est, in divinis litteris genitum proprie positum nec legere possunt penitus nec probare. Sed quia id ipsum fides exigit christiana absque ulla dubitatione ingenitus creditur, qui tamen secundum seriem scripturarum in filio a se genito visus esse monstratur.

4 De cetero placuit propter malorum hominum infestationes, ut in accusatione domini ministrorum primo persona, fides, vita et conversatio blasphemantium enucleatim perscrutetur. Nam fides omnes actus hominis praecedere debet, quia dubius in fide infidelis est, nec eis omnino esse credendum, qui veritatis fidem ignorant, nec rectae conversationis vitam ducunt, quoniam tales facile et indifferenter lacerant et criminantur recte et pie viventes. Ideo suspicio eorum discutienda est primum et corrigenda.

5 Neque accusatoribus suspectis vel de inimicorum domo prodeuntibus est credendum. Erant enim quidam, qui prius videbantur esse ex nobis, sed non erant ex nobis. Si vero essent ex nobis, mansissent utique nobiscum et non conturbassent fratres. Exacuerunt enim, ut ait propheta, linguas suas sicut serpentes, venenum aspidum sub labiis eorum. Quapropter hi respuendi sunt, si incorrigibiles apparuerint, et vitandi, ne domino decipiant famulantes.

6 State ergo, dilectissimi, super vias aspicientes et interrogantes de semitis domini antiquis et videte, quae est via bona et recta, et ambulate in eam et invenietis requiem animabus vestris.

7 Data XVI Kl. Maii sub Adriano et Vero.